



Enstalasyon 5 nouvo Akademisyen, 21 fevriye 2018

- | | | | |
|--|-----|--|------|
| • Editorial | p.2 | • Lansman Regwoupman Pwofesè Kreyòl nan Vèrèt | p.7 |
| • Kreyòl pale nèt san baboukèt | p.2 | • Senatè Jean Renel Sénatus vizite Akademi Kreyòl Ayisyen | p.7 |
| • Lang matènèl nan edikasyon dwe tounen yon reyalite | p.3 | • Amandman Konstitisyon an: kisa AKA panse? | p.8 |
| • Bonjan zouti pou jounalis yo pi byen kominiye nan medya yo | p.4 | • Lanmò Akademisyen Rachel Beauvoir Dominique | p.9 |
| • Aprann mizik an kreyòl san grate tèt posib gras ak Metòd “Jaden mizik” | p.4 | • Omaj pou Iv Dejan nan okazyon lanmò li | p.9 |
| • Misyon AKA nan Latibonit | p.5 | • Tankou tout lang, kreyòl gen règ li, an nou respekte yo! | p.10 |
| • Akademi Kreyòl Ayisyen nan Bomon | p.6 | • Espas refleksyon Akademisyen | p.10 |
| • Tomond ap li | p.6 | • Kalandriye aktivite AKA pou mwa lang ak kilti kreyòl 2018 la | p.11 |
| • Fred Edson Lafortune ranpòte 4 ^{èm} edisyon Pri Pwezi Dominique Batrville | p.7 | | |

Editorial

Depi se kreyòl, tout moun konsène, paske kreyòl se lang tout Ayisyen. Se yonn nan rezon ki fè Akademi Kreyòl Ayisyen (AKA) toujou mete zòrèy li an twonpèt pou li tande ak pran nòt sou sa tout moun panse ki ta dwe fèt pou lang kreyòl la sèvi tout bon nan tout sektè aktivite nan peyi a. Nan lide sa a, Akademi Kreyòl Ayisyen, nan mwa fevriye 2018, te fè yon premye piblikasyon liv 100 Kesyon pou AKA. Anndan liv sa a, ou kapab jwenn divès kesyon elèv lekòl, etidyan ak lòt moun nan popilasyon an te poze Akademisyen yo nan diferan vizit yo t ap fè nan peyi a. AKA ap pare yon lòt edisyon revize, korije, ogmante pou fevriye 2019.

Patisipan yo poze anpil kesyon nan kozri, konferans, ak lòt aktivite Akademi an òganize, men genyen yon seri kesyon

popilasyon an poze plis pandan diferan depلاسman AKA fè nan peyi a. Pa egzanp: Ki lè liv lekòl yo ap an kreyòl? Poukisa yon lekòl oblije bay timoun ki pale kreyòl pinisyon? Sou premye kesyon an, nou dwe dakò gen jefò ki deja fèt pou gen plis liv an kreyòl e dwe gen plis liv lekòl ki fèt an kreyòl. Dezyèm kesyon an konsène Ministè Edikasyon Nasyonal ki dwe pran bonjan sanksyon kont tout lekòl ki ta pini yon timoun paske li pale lang manman l anndan lekòl. Paske gen moun k ap poze kesyon sa yo, sa montre nan ki pwèn gen anpil travay ki rete pou fèt sitou nan domèn edikasyon.

Pandan twa (3) premye ane egzistans li, Akademi an kòmanse rasanble materyo pou bati fondasyon k ap pèmèt tout Ayisyen, nan kèlkeswa domèn y ap evolye a, jwenn zouti ki egziste nan lang kreyòl la pou

yo kapab fonksyone. Premye rezolisyon sou òtograf la se yonn toujou. Gen lòt ankò tankou: Pwojè Diksyonè kreyòl ayisyen ak lòt rezolisyon ki nan preparasyon. Akademi an p ap plenyen, men tout moun dwe konnen li manke mwayen pou li egzekite tout pwojè li gen nan pwogram li. Akademisyen yo ak tout sekretarya egzekitif la motive, epi popilasyon an ap tann ki bon rezilta k ap soti nan travay Akademi an depi kreyasyon li nan lane 2014.

Anpil travay, anpil pwojè, anpil detèminasyon tou ap gide Akademi an nan batay l ap mennen pou respè lang kreyòl la. Li kontan wè anpil patnè potekole ak li men l ap tann tout moun nèt paske defans lang kreyòl la se zafè tout Ayisyen epi se nou tout ki dwe pote kontribisyon nou pou lit la tounen yon viktwa pou nou tout.

Kreyòl pale nèt san baboukèt

Akademi Kreyòl Ayisyen selebre mwa lang ak kilti kreyòl 2017 la sou tèm: **“Jèn yo, an nou sèvi ak lang nou tout kote san baboukèt!”** Pou selebrasyon sa a, Akademi an te mete kanpe de (2) komite: yon komite nasyonal ki te rasanble reprezantan divès enstitisyon leta kou prive ak yon komite rejyonal nan Depatman Nò ki te gen misyon prepare kloti selebrasyon mwa lang ak kilti kreyòl la nan Milo nan lakou Palè San Sousi.

Akademi an te lanse mwa lang ak kilti kreyòl la jou vandredi 6 oktòb 2017 la ak yon seremoni



Seremoni ofisyèl jounen entènasyonal lang kreyòl, oktòb 2017

ofisyèl nan Jaden MUPANAH (Channmas).

Pandan tout mwa a, Akademi an te anime plizyè kozri sou pwodiksyon literè ak syantifik nan lang kreyòl, li te fè espozisyon liv tou. Akademisyen

yo ak Sekretarya Egzekitif Akademi an te patisipe nan anpil emisyon nan radyo ak nan televizyon epi Akademi an te òganize yon fòmasyon pou pwofesè kreyòl nan Depatman Nò ak Nòdès ak konkou UNESCO epi Ministè Edikasyon Nasyonal ak Fòmasyon Pwofesyonèl.

Akademi an te reyalize de (2) gwo aktivite pou li make 28 oktòb la ki se Jounen entènasyonal lang ak kilti kreyòl la. Sòti 9è pou rive 11è nan maten, Akademi an te òganize yon espozisyon

liv ak materyèl didaktik nan lang kreyòl nan vil Milo. Plizyè enstitisyon te patisipe nan aktivite sila a: Librairie du Succès, Kopivit L'Action Sociale, Editions Université Caraïbe, Editions Choucounne ak Jounal Bon Nouvel. Epi, a 5è nan aprèmidi, nan Palè San Souci (Milo), li te reyalize yon gwo koudjay kiltirèl ak patisipasyon plizyè jèn atis Milo, fanfa wayal an prezans tout otorite lokal yo.

Lang matènèl nan edikasyon dwe tounen yon reyalite



Enstalasyon manm konsèy konsiltatif AKA, 21 fevriye 2018

Akademi Kreyòl Ayisyen selebre mwa lang matènèl 2018 la sou tèm: « *Lang manman nan edikasyon: wi. Aprann se konprann!* »

Akademi an te chwazi Depatman Sid pou li dirije karavàn li a soti 15 pou rive 17 fevriye. Karavàn sila a te pase nan vil Okay, nan komin Senjan ak nan Tòbèk.

Akademi an te rankontre asosyasyon pwofesè kreyòl epi li te reyalize plizyè konferans sou enpòtans lang matènèl nan edikasyon.

Seremoni ofisyèl pou klotire aktivite mwa a

te fèt mèkredi 21 fevriye 2018 la ki se Jounen entènasyonal Lang matènèl soti 10è nan maten pou rive 12è30 nan aprèmidi nan sal konvansyon Banque de la République d'Haïti, kote divès pèsonalite politik, relijye, soyal te prezan.

Akademi an te pwofite enstale senk (5) nouvo Akademisyen ak douz (12) Manm Konsèy Konsiltatif la. Li te onore de (2) pèsonalite ki make devlopman lang kreyòl la: *Ekriven Emile Célestin Meggie (Togiram) ak Powèt Georges Castera.*

Bonjan zouti pou jounalis yo pi byen kominike nan medya yo



Atelye travay nan fòmasyon jounalis yo

Akademi Kreyòl Ayisyen te òganize yon jounen fòmasyon sou kominikasyon kreyòl nan medya pou jounalis. Li te reyalize jounen sa a jou mèkredi 2 me 2018 la nan lokal Direction des Etudes Post-Graduées de l'Université d'Etat d'Haïti (UEH) a nan Pacot, sòti 8è nan maten pou rive 4è nan aprèmidi, nan okazyon Jounen entènasyonal libète laprès la (3 me 2018). Plis pase 20 jounalis ki te reprezante 13 medya te patisipe nan fòmasyon sila a ki te dewoule sou tèm : Inisyasyon sosyolengwistik, Teknik ak estrateji kominikasyon sosyal oral ak ekri, Òtograf lang kreyòl ayisyen epi Pwoblèm entèferans nan kominikasyon kreyòl.

Entèvenan yo te montre gwo responsablite jounalis yo genyen pou yo byen itilize lang kreyòl la nan kad travay yo paske y ap fè 2 travay alafwa : enfòm epi fòm popilasyon an. Sa ki fè jounalis se gwoup pwofesyonèl ki pi pre popilasyon an.

Anpil nan patisipan yo te mete aksan sou nesosite pou sal nouvèl yo ta gen yon seksyon kreyòl ki pou trete enfòmasyon an kreyòl menm jan sa fèt an fransè.

Akademi an te remèt chak patisipan yon sètifika nan finisman fòmasyon an. Patisipan yo te montre yo satisfè e yo swete Akademi an òganize pi souvan modèl fòmasyon sa yo ki pèmèt yo jwenn bonjan zouti pou yo kominike kòm sadwa.



Foto souvni fòmasyon pou jounalis nan Pòtoprens, 2 me 2018

Aprann mizik an kreyòl san grate tèt posib gras ak metòd “Jaden mizik”



Kozri ant Micheline L. Denis ak yon gwoup pwofesè mizik, 8 jen 2018

Vandredi 8 jen 2018 la, soti 2è30 pou rive 4è30 nan aprèmidi, Akademi Kreyòl Ayisyen òganize nan Bibliyotèk Michèle Tardieu Petyonvil yon kozri sou “Jaden Mizik”, yon metòd pyanis Micheline Laudun Denis kreye pou anseye mizik an kreyòl. Lang kreyòl la ap kontinye layite kò li tout kote, nan plizyè domèn.

Pwofesè mizik ki soti nan divès lekòl nan Pòtoprens ak nan zòn ozalantou yo te fè depasman pou yo vin tande sa madam Denis

genyen nan djakout li. Avèk metòd Jaden Mizik, plis timoun nan peyi Ayiti kapab aprann mizik nan lang manman yo. Tank n ap sèvi ak lang kreyòl la nan domèn aktivite nou, se tank lang kreyòl la ap montre nou kapasite l pou li sèvi nou tou, nan tout sitiyasyon lavi a.

Akademi Kreyòl Ayisyen te reyalize aktivite sila a nan kad selebrasyon Jounen Nasyonal Timoun (10 jen 2018). Pou okazyon an, Akademisyen Jean Pauris Jean-Baptiste, Prezidan Konsèy Administrasyon AKA a, te pran lapawòl pou li bay madam Denis yon ochan san tokay pou bèl pa sa a li pèmèt lang peyi a franchi nan domèn mizik. Li pa t bouke rafrech memwa asistans la sou nesesite pou n bay timoun yo bonjan fòmasyon pandan yo piti.

Sou bò pa li, Micheline Laudun Denis te pwofite remèt patisipan yo yon CD mizik pou timoun ak yon liv gid-mèt ki kapab akonpaye pwofesè mizik ki ta renmen travay sou lobedyans metòd Jaden Mizik la. Jaden Mizik la prezante nan de (2) lang :

kreyòl ak fransè. Daprè temwayaj kèk patisipan, madam Denis reyalize yon travay enpòtan ki ale nan sans modènizasyon sistèm edikasyon nan peyi a sitou nan kindègadenn, kote se chante franse, ki pa toujou genyen rapò ak reyalyte timoun nou yo ap viv, ki domine repètwa chante pou timoun. “Lekòl, kòm yon ajan sosyalizasyon ki puisan anpil, ta dwe konsidere reyalyte pa timoun yo. Chante yo ap aprann ta dwe makònen ak reyalyte lengwistik ak kiltirèl yo”. Nou t ap site yonn nan patisipan nan kozri a.

Akademi Kreyòl Ayisyen te pwofite remèt Micheline Laudun Denis yon plak Onè ak Merit, yon fason pou li di li mèsi pou tout sa li reyalize nan domèn mizik ak pou metòd sa a li pote bay tout moun k ap pratike mizik. Pyanis la te resevwa plak la ak anpil plezi nan men Prezidan Jean Pauris Jean-Baptiste ki te genyen bò kote li kat (4) lòt Akademisyen: Adeline Chancy, Pierre Michel Chéry, Clotaire Saint-Natus ak Marie Rodny Laurent Estéus.

Misyon AKA nan Latibonit

Sòti 11 pou rive 14 avril 2018, Akademi Kreyòl Ayisyen te reyalize yon misyon pou premye fwa nan Ènri, Tènèv ak Gwomòn, 3 komin nan Depatman Latibonit. Li te anime plizyè konferans pou elèv ak pwofesè nan Lise Toussaint Louverture, L'Ecole Nationale de Deranne, l'Eglise Baptiste Conservatrice de Terre-Neuve ak nan oditoryòm Eulalue du Rocher.

Patisipan yo te vrèman kontan aktivite a. Akademi an te pwofite distribiye premye rezolisyon òtograf lang

kreyòl ayisyen an, rezolisyon fowòm sou dwa lengwistik timoun lekòl la, depliyen AKA ak kèk nimewo Jounal Bon Nouvèl.



Prezidan Akademi Kreyòl Ayisyen nan Tènèv, 13 avril 2018

Akademi Kreyòl Ayisyen nan Bomon



Foto souvni delegasyon AKA ak elèv Bomon

Akademi Kreyòl Ayisyen te patisipe nan inogirasyon Bibliyotèk Entènasyonal Bomon, dimanch 21 janvye 2018, nan okazyon

Tomond ap Li



Espozisyon liv nan Tomond

Akademi Kreyòl Ayisyen te reponn prezan nan komin Tomond kòm Envite Espesyal pou li te patisipe nan aktivite kiltirèl « Tomond ap li » vandredi 16 ak samdi 17 mas 2018. Aktivite sila a te dewoule nan okazyon Fèt Patwonan komin Tomond nan (19 mas). Plizyè asosyasyon te met tèt ansanm pou yo òganize aktivite sa yo, nou kapab site : Fondation des Anciens Elèves de l'Ecole Marie Auxiliatrice de Thomonde (FAEEMAT), Collectif des Actions Socio-Culturelles pour le Développement (CASCUDE), Solidarité des Jeunes de Thomonde (SOJETHO) ak Mouvement des Jeunes Innovateurs de Thomonde (MOJIT).

selebrasyon 25^{em} anivèsè Lise Nasyonal Bomon an. Akademi an te pwofite moman sa a pou li onore memwa Akademisyen Claude C. Pierre ki te moun Koray e ki mouri an 2017. Prezidan Akademi an, Pauris Jean-Baptiste, te pwofite okazyon an pou li prezante travay Akademisyen Claude C. Pierre epi raple wòl li te jwe nan mete Akademi an sou pye. Prezidan an te rankontre tou otorite sivil, politik ak relijye zòn nan pou li sansibilize yo sou enpòtans travay enstitisyon l ap dirije a.

Akademi Kreyòl Ayisyen ansanm avèk Editions Miroir, Editions de l'Université d'Etat d'Haïti ak Editions Choucoun te espoze plis pase 300 tit liv kreyòl ki te resevwa vizit plizyè dizèn patisipan (timoun, jèn kou granmoun). Se nan menm okazyon sa a reprezantan AKA yo te reponn kesyon patisipan yo epi yo te pwofite remèt chak vizitè yon depliyon prezantasyon Akademi an, yon jounal Bon Nouvèl ak livrè Rezolisyon sou òtograf lang kreyòl la ak sou Dwa lengwistik Timoun. Òganizatè Tomond ap Li yo mande Akademi an ak edisyon ki te prezan yo pou yo toujou patisipe nan aktivite kiltirèl sa a k ap kontinye fèt chak ane nan menm peryòd la.



Delegasyon Akademi Kreyòl Ayisyen

Fred Edson Lafortune ranpòte 4^{èm} edisyon Pri Pwezi Kreyòl Dominique Batrville nan Jakmèl

Akademi Kreyòl Ayisyen patisipe nan seremoni ofisyèl pou remèt prim 4^{èm} edisyon Pri Pwezi Kreyòl Dominique Batrville la. Edisyon Pulucia te reyalize seremoni an nan dat 13 janvyè 2018, nan sal konferans meri Jakmèl la.

Edisyon Pulucia kreye Pri Pwezi Kreyòl Dominique Batrville la nan lane 2014. Depi lè sa a, chak ane li rekonpanse 2 ekriven ki pwodui an kreyòl. Pou lane 2017 la (4^{èm} edisyon), se Fred Edson Lafortune ki ranpòte premye pri a.

Sekretè Egzekitif Akademi an, Luna Gourgue,

te pwofite okazyon sa a pou li rankontre kèk pwofesè lang kreyòl ak kèk jèn dizè, eslamè, powèt Depatman Sidès la. Pandan rankont sila a, Direktè Jeneral Edisyon Pulucia a, Ancion Pierre-Paul, mande Akademi an pou li patisipe ofisyèlman kòm ko-òganizatè Pri a apati lane 2018 (5^{èm} edisyon) menmjan ak Alliance Française. Pwofesè kreyòl yo menm te mande Akademi an pou li òganize fòmasyon sou didaktik lang pou yo.

Lansman Regwoupman Pwofesè Kreyòl nan Vèrèt



Foto souvni Prezidan AKA ak yon gwoup elèv ak pwofesè, nan Vèrèt

Akademi Kreyòl Ayisyen patisipe, sòti 14 rive 16 septanm 2017 nan komin Vèrèt, nan lansman Regwoupman Pwofesè Kreyòl. Delegasyon

Akademi an te pwofite okazyon an pou li vizite Bibliyotèk Kominotè Dechapèl la, kote li te fè yon ti koze ak piblik la ki te gen ladan li pwofesè kreyòl, ekriven, powèt, etidyan ak lòt manm popilasyon lokal la. Prezidan Akademi an, Jean Pauris Jean-Baptiste ki te nan tèt delegasyon an, te pale sou kreyasyon ak misyon Akademi an pandan li pa te neglije pataje kèk temwayaj ki gen rapò ak istwa li nan lit pou lang kreyòl la rive pran plas li nan sosyete a. Akademisyen Rogéda Dorcé Dorcil te ensiste sou enpòtans lang kreyòl la pou vansman edikasyon nan peyi a.

Senatè Jean Renel Sénatus vizite Akademi Kreyòl Ayisyen

Prezidan Komisyon Jistis Sena Repiblik la, Senatè Jean Renel Sénatus, te vizite biwo Akademi Kreyòl Ayisyen an jou mèkredi 13 desanm 2017 la. Senatè Sénatus ak reprezantan Akademi an te diskite sou itilizasyon lang kreyòl la nan preparasyon tèks lwa yo, espesyalman nouvo kòd penal la ak nouvo kòd pwosedi penal la, jan Konstitisyon an mande



Senatè Jean Renel Sénatus nan lokal AKA, 13 desanm 2017

sa. Senatè Sènatous ak Prezidan Akademi an pwomèt y ap kontinye chitapale yo. Reprezantan Akademi an mande Senatè Sènatous pou li fasilite travay Akademi an nan ankouraje aplikasyon règ

lang kreyòl la kòm sadwa nan travay palman an espesyalman nan Sena Repiblik la.

Amandman Konstitisyon an: kisa AKA panse?



Vizit Depite Jerry Tardieu nan AKA, 5 avril 2018

Prezidan komisyon k ap travay sou amandman Konstitisyon 1987 la, Depite Jerry Tardieu, te vizite Akademi Kreyòl Ayisyen jedi 5 avril 2018 la, aprè yon premye chitapale li te fè ak Dirijan Akademi an sou kesyon amandman Konstitisyon an. Vizit sa a se te pou rapousuiv diskisyon yo te deja kòmanse yo. Prezidan komisyon an te mande Akademi an èd li nan tradiksyon tout dokiman komisyon l ap dirije a ap prepare sou kesyon amandman an.

Akademi an vle mete aksan sou nesesite pou Konstitisyon amande a gen yon vèsyon kreyòl ki respekte tout règ lang nan. Pou sa, li te ofri komisyon an èd li pou li revize tout vèsyon kreyòl dokiman yo. Se konsa Akademi an travay sou premye vèsyon kreyòl komisyon an te genyen an "Sa nasyon an panse" e AKA ap kontinye travay sou tout rès dokiman yo rive jis nan vèsyon final la.

Lanmò Akademisyen Rachel Beauvoir Dominique




Akademisyen Rachel B. Dominique

Antwopològ
R a c h e l
B e a u v o i r
Dominique mouri
jou vandredi 5 janvye
2018 la. Konsèy
Akademisyen an,
nan Asanble Jeneral

li nan mwa desanm 2017 la, te apwouve kandidati
Madam Dominique kòm Akademisyen. Nan
seremoni enstalasyon 5 nouvo Akademisyen nan
mwa fevriye 2018 la, se mari li Didier Dominique,
ki te resevwa sètifika Rachel Dominique ki
konsève tit Akademisyen an malgre li mouri.

Omaj pou Iv Dejan nan okazyon lanmò li



Pwofesè Iv Dejan

Akademi Kreyòl Ayisyen te òganize yon
Aveye omaj pou Pwofesè Iv Dejan, madi
3 avril 2018 la nan lokal Direction des Etudes
Post-Graduées de l'Université d'Etat d'Haïti
(UEH), Pacot, nan okazyon lanmò li nan dat
29 mas 2018. Plizyè pèsonalite te pran lapawòl
nan okazyon an pou yo temwaye sou zèv ak
vi Pwofesè Dejan. Pami pèsonalite sa yo nou
ka site: Sekretè Leta pou Alfabetizasyon an,
Mesye Emile Brutus; Visdwayen akademik



Delegasyon Akademisyen yo nan antèman pwofesè Dejan

Fakilte Lengwistik Aplike a, Mesye Wilhem
Michel; Pwofesè Lemète Zéphyr ; Visprezidan
Akademi Kreyòl Ayisyen an, Akademisyen
Rodny Laurent Estéus; Akademisyen Adeline
Chancy; Akademisyen Jocelyne Trouillot.
Tout temwayaj yo te mete aksan sou kalite zèv
pwofesè Dejan yo ak angajman li pou li te defann
lang ak kilti kreyòl la. Jou mèkredi 4 avril la
menm, a 9è nan maten, yon delegasyon Akademi
an te patisipe nan antèman Pwofesè Dejan ki te
fèt nan legliz Saint Louis Roi de France, Turgeau.
Akademi Kreyòl Ayisyen salye memwa pwofesè
Iv Dejan pou tout travay li fè pou vansman lang
ak kilti kreyòl la sitou nan domèn edikasyon.

Tankou tout lang, kreyòl gen règ li, an nou respekte yo !

Lang ak kilti se 2 mak fabrik idantite yon pèp. Pa gen yon pèp ki egziste ki pa gen yon lang, yon kilti ki rele l chèmèt chèmètrès e ki karakterize li. E toulède mache ansanm : Lang nan se yon eleman anndan kilti a anmenm tan lang nan pèmèt ou esprime kilti a, li se yonn nan manifestasyon idantite kiltirèl yon pèp.

Se nan lide sa a, Akademi Kreyòl Ayisyen ap selebre Mwa Lang ak Kilti Kreyòl 2018 la sou tèm : **Tankou tout lang, kreyòl gen règ li, an nou respekte yo!**, se yon fason pou li envite tout moun fè yon efò anplis pou yo respekte règ lang kreyòl la nan pale tankou nan ekri.

Akademi an chwazi tèm sa a apati obsèvasyon li fè nan jan moun ap pale, jan moun ap ekri kreyòl la ki pa koresponn ak prensip lang nan. Jeneralman, paske se kreyòl gen moun ki gen tandans di tout vout se do. Yo panse yo ka pale l nenpòt ki fason, yo ka ekri l jan yo vle. Men lè se yon lòt lang tout moun konfòme yo nan chèche konnen tout règ yo, tout prensip yo pou yo pa fè fot, pou yo pale ak ekri yo byen. Alòske, kreyòl la se yon lang menm jan ak tout lang sa yo. E kòm tout lang li gen règ sentaksik, mòfolojik, fonolojik li, elatriye. Tout moun k ap itilize lang nan dwe respekte yo. Se règ ak prensip sa yo ki fè yon lang diferan ak yon lòt lang, menm si yo gendwa sanble sou kèk pwen. Se sa ki fè yon moun ka pa konn ni li ni ekri men kou yon moun ap pale yon lang ki pa lang li a li idantifye sa a.

Se konsa, nan kad batay l ap mennen pou respè lang nan, Akademi an, nan mwa jen 2017, te fè soti ansanm ak MENFP, FLA, yon rezolisyon sou otograf lang kreyòl la pou pèmèt popilasyon an jwenn zouti pou li ekri lang nan byen ; nan mwa novanm 2017, ansanm ak UNESCO, MENFP, li te reyalize nan Depatman Nò yon fòmasyon sou didaktik lang matènèl pou pwofesè kreyòl ; nan mwa me 2018, li te òganize yon fòmasyon sou komunikasyon kreyòl pou jounalis yon mannyè pou yo kapab itilize lang kreyòl la pi byen nan mesaj, nan enfòmasyon y ap bay nan radyo ak nan televizyon. E, Akademi an p ap kanpe la. L ap kontinye travay pou li pote bonjan materyèl pou popilasyon an kapab jwenn zouti pou li byen ekri lang nan, pou dirèktè ak pwofesè lekòl yo kapab anseye li pi byen.

Pou mwa oktòb 2018 la, Akademi an prevwa òganize fòmasyon pou pwofesè ak jounalis Gonayiv. Epi nan pwojè li, Akademi an genyen pou li fè soti yon lòt rezolisyon k ap chita sou kesyon sentaks lang kreyòl la.

Pale lang nan, ekri lang nan, itilize li nan tout domèn se byen men pale lang nan, ekri li kòrèkteman se respekte lang nan e respekte tèt nou kòm Ayisyen. Se pou sa, Akademi an envite tout moun k ap sèvi ak lang kreyòl la: editè, ekriven, jounalis, dirèktè, pwofesè, tout enstitisyon yo (Leta kou prive) pou yo respekte tout règ lang kreyòl la genyen kit nan pale, kit nan ekri.

Espas refleksyon Akademisyen

Akademi Kreyòl Ayisyen decide òganize chak mwa yon « Espas refleksyon Akademisyen » pou li pèmèt Akademisyen yo reflechi, bay lide yo sou kèk sijè enpòtan sou kesyon lang, edikasyon, lajistis, elatriye. Se nan sans sa a, Akademi an te reyalize premye espas refleksyon an sou Plan Décennal d'Éducation et de Formation 2017-

2027 (PDEF), vandredi 25 me 2018 la soti 9è nan maten pou rive 3è nan aprèmidi, nan lokal Société Biblique Haïtienne nan. Akademi an t ap reflechi sou dokiman sa a Ministè Edikasyon Nasyonal te voye ba li nan lide pou li pwodui kòmantè ak sijesyon li. Te genyen anpil diskisyon sou diferan pwen ki te nan plan sa a. Se konsa, apre tout

braselide yo, Akademi an soti ak pwopozisyon sa yo.

- Pwoblematik amenajman lang kreyòl la nan sistèm edikatif la dwe parèt klè nan mizankontèks dokiman PDEF la ;
- Amelyorasyon kalite edikasyon an dwe daplon ak itilizasyon lang kreyòl la kòm lang ansèyman nan lekòl yo ;
- Lekti ak Ekriti se pivo pou amelyore kalite edikasyon yon sosyete, li enpòtan pou PDEF la bay kreyòl la plas li merite nan aktivite lekti ak ekriti, PDEF la dwe gen plis anbisyon nan pèspektiv pou amelyore kapasite lekti-ekriti elèv yo
- PDEF la dwe konsidere diferans lengwistik yo nan Suivi ak Evalyasyon aprantisaj la ;
- Evalyasyon pedagogik pou timoun 6 lane k ap rantre lekòl dwe fèt nan lang kreyòl ;
- Dokiman PDEF la dwe klarifye pou tout moun plas lang kreyòl la ap jwe nan pwogram nouvo segondè yo;
- Lang kreyòl la dwe lang ansèyman pou matyè tankou : Istwa, Jewografi, Enstriksyon sivik, Literati aysisyen (Espresyon kreyòl) nan tout sistèm nan.

Kalandriye aktivite AKA pou mwa lang ak kilti kreyòl 2018 la

Aktivite		Dat / Lè
1	Konferans pou Laprès (Nan kad « Les lundis de la presse »)	Lendi 1 ^e oktòb 9è30 nan maten
2	Seremoni lansman Mwa Lang ak Kilti Kreyòl la	Madi 5 oktòb 10è nan maten
3	Konferans sou tèm mwa lang ak kilti kreyòl la nan lekòl, inivèsite, bibliyotèk, sant kiltirèl / Espozisyon liv ak dokiman kreyòl	Tout mwa oktòb la
4	Fòmasyon pou jounalis Latibonit	Jedi 25 oktòb 8è nan maten-4è nan aprèmidi
5	Fòmasyon pou pwofesè kreyòl Latibonit	Vandredi 26 oktòb 8è nan maten-4è nan aprèmidi
6	Konbit bwazman teren AKA nan mòn blan (Gonayiv)	Samdi 27 oktòb 9è nan maten
7	Seremoni ofisyèl pou mete bout nan aktivite mwa lang ak kilti kreyòl la (Gonayiv). Koudjay Kiltirèl	Samdi 27 oktòb 4è nan aprèmidi

Espas lektè yo

Ou bezwen bay lide w sou travay Akademi Kreyòl Ayisyen fè deja ak lòt travay li ta dwe fè ! Ou bezwen enfòmasyon sou Akademi Kreyòl Ayisyen an!

Ekri Akademi an sou:

direksyonkominikasyon@akademikreyol.net oubyen
ou ka vizite paj facebook Akademi an: facebook/
akademikreyol ak sit entènèt li : www.akademikreyol.net

Pwovèb kreyòl

Krab mache krab gra ki vle di yon moun dwe toujou chache travay, poze aksyon, fè jefò pou l chanje kondisyon l ap viv paske si ou leve chak jou ou pa bouje, ou p ap janm vanse.

Moun ki tonbe pou ou, se pou li ou woule ki vle di moun ki fè sakrifis pou ou, moun ki ede ou nan lavi se li pou w ede lè li nan yon move enpas, nan yon move sitiyasyon.

Ekip Bilten an

Pwodiksyon

Direksyon kominikasyon AKA

Redaksyon

Mideline Dragon Jules-Saint
Emmanuel Lafalaise
Anivince Jean Baptiste

Koreksyon

Luna Gourgue
Jean Rony Beaucicault

Revizyon

Komisyon Kominikasyon AKA

Konsepsyon

Herold Joseph

Piblikasyon

Sekretarya Egzekitif AKA

AKADEMI KREYÒL AYISYEN

#6, Ri des Marguerites, Turgeau, Pòtoprens, Ayiti
(509) 3333-0816 / 2817-5964
enfomasyon@akademikreyol.net
www.akademikreyol.net